

Adroddiad i'r: Cyngor Sir

Dyddiad y cyfarfod: 6 Gorffennaf 2021

Aelod Arweiniol / Swyddog: Cyng Julian Thompson-Hill, Dirprwy
Arweinydd a'r Aelod Arweiniol Cyllid, Perfformiad ac Asedau
Strategol / Alan Smith, Pennaeth Gwella Busnes a
Moderneiddio

Awdur yr Adroddiad: Nicola Kneale, Rheolwr Tîm Cynllunio Strategol / Iolo McGregor
Arweinydd y Tîm Cynllunio Strategol a Pherfformiad

Teitl Adolygiad Perfformiad Blynyddol 2020 i 2021

1. Am beth mae'r adroddiad yn sôn?

1.1. Mae'r adroddiad hwn yn cyd-fynd â'r Adolygiad Perfformiad Blynyddol drafft ar gyfer 2020 i 2021 (gweler atodiad 1), sy'n darparu ein dadansoddiad chwarterol a'n dadansoddiad diwedd blwyddyn, ac yn amlygu prosiectau penodol a chamau cyflenwi yn 2021 i 2022.

2. Beth yw'r rheswm dros lunio'r adroddiad hwn?

2.1. Darparu gwybodaeth ynglŷn â chynnydd y cyngor o ran darparu canlyniadau'r Cynllun Corfforaethol yn chwarter 4, 2020 i 2021, gan gyflawni ein rhwymedigaeth statudol i gyhoeddi adroddiad blynyddol ar berfformiad erbyn 31 Hydref o dan Fesur Llywodraeth Leol (Cymru) 2009. Mae hefyd yn ymateb i'n dyletswydd o amgylch monitro cydraddoldeb (o dan y Ddeddf Cydraddoldeb 2010 a Mesur Cymru 2011, sy'n cynnwys y Ddyletswydd newydd economaidd-gymdeithasol); ein cyfraniadau at Ddeddf Lles Cenedlaethau'r Dyfodol (Cymru) 2015; ac am y tro cyntaf, ymateb i'r gofyn i hunanasesu o dan Ddeddf Llywodraeth Leol ac Etholiadau (Cymru) 2021.

2.2. Rhoi gwybod i aelodau am brosiectau'r Cynllun Corfforaethol y bwriedir eu cyflawni yn 2021 i 2022, y mae'n rhaid i'r Cyngor ei gyhoeddi i fodloni ei ddyletswydd gwella o dan Fesur Llywodraeth Leol (Cymru) 2009.

- 2.3. Mae adroddiadau rheolaidd yn ofyniad monitro hanfodol yn fframwaith rheoli perfformiad y cyngor. Rydym yn monitro ein perfformiad yn rheolaidd ac yn cyflwyno adroddiadau bob chwarter blwyddyn i gyfarfodydd y Pwyllgor Craffu a'r Cabinet ac yn llunio Adolygiad Perfformiad Blynyddol i werthuso cynnydd.
- 2.4. Mae'n rhaid gwneud penderfyniad ynghylch cymeradwyo Adolygiad Perfformiad Blynyddol 2020 i 2021.

3. Beth yw'r Argymhellion?

- 3.1. Argymhellir, yn amodol ar unrhyw newidiadau cytunedig, bod y Cyngor yn cymeradwyo Adolygiad Perfformiad Blynyddol 2020 i 2021.

4. Manylion yr Adroddiad

- 4.1. Mae Cynllun Corfforaethol y Cyngor 2017-2022 yn gosod y cyfeiriad strategol i'r cyngor a'i flaenoriaethau dros y cyfnod o bum mlynedd. Nodir y manylion ynglŷn â'r hyn y mae'r cyngor yn bwriadu ei wneud bob blwyddyn i helpu i gyflawni'r blaenoriaethau hyn yn y cynlluniau gwasanaeth blynyddol. Mae'r prosiectau yn deillio o Gynlluniau Gwasanaethau a Rhaglenni. Bydd cynnydd yn cael ei adrodd i'r Pwyllgor Craffu Perfformiad, y Cabinet a'r Uwch Dîm Arweinyddiaeth drwy ein Hadroddiadau Perfformiad Chwarterol.
- 4.2. Mae'r Adroddiad Perfformiad Blynyddol hwn yn darparu gwerthusiad ôl-weithredol o lwyddiant y Cyngor wrth gyflawni yn erbyn y cynlluniau hyn yn ystod 2020 i 2021, a p'un ai yw'r Cyngor wedi llwyddo i gyflawni ei rwymedigaeth i wneud trefniadau i sicrhau gwelliannau parhaus. Mae hefyd yn cael golwg ymlaen at yr hyn a fydd yn cael ei gyflawni yn 2021 i 2022.
- 4.3. Am y tro cyntaf mae'n cynnwys pennod 'beilot' newydd i fodloni'r angen i hunanasesu o dan Ddeddf Llywodraeth Leol ac Etholiadau (Cymru) 2021. Mae'n canolbwyntio ar saith maes llywodraethu allweddol. Gan ddefnyddio tystiolaeth a gyhoeddwyd ac sydd ar gael gan ffynonellau mewnol ac allanol, ac o edrych ar ddata a gytunwyd gan Uwch Reolwyr, mae'r bennod yn peintio darlun ehangach am y cyd-destun y mae'r cyngor yn gweithredu ynddo wrth ddarparu ei amcanion perfformiad. Mae hefyd yn ceisio tynnu ar unrhyw gamau allweddol i wella perfformiad wrth fynd ymlaen. Mae'r adroddiad wedi cael ei ddrafftio yn y ffordd hon ar ôl derbyn cyngor annibynnol trwy CLILC, ac rydym yn sicr y bydd, ar y cyd â'n gwerthusiad arferol o

berfformiad yn erbyn ein blaenoriaethau corfforaethol, yn ateb y gofyniad newydd i gynhyrchu hunanasesiad blynyddol o dan y Ddeddf.

- 4.4. Yn ogystal â'n pennod newydd ar lechyd Corfforaethol, mae Atodiad 1 yn cynnwys naratif am gynnydd o ran darparu ein blaenoriaethau corfforaethol, gan gynnwys y statws presennol a chynnydd y rhaglen. Ym mhob is-adran blaenoriaeth corfforaethol, mae adrannau Lles a Chydraddoldeb hefyd sy'n sôn am ein cyfraniadau i Ddeddf Llesiant Cenedlaethau'r Dyfodol (Cymru) 2015; a Deddf Cydraddoldeb 2010 a Mesur Cymru 2011 (sy'n cynnwys y ddyletswydd economaidd-gymdeithasol). Yn ogystal â Chydraddoldeb ac Amrywiaeth, rydym hefyd yn gwerthuso ein cyfraniadau i'r Gymraeg a Datblygu Cynaliadwy, ac yn tynnu allan unrhyw negeseuon allweddol gan ein rheoleiddwyr a data cenedlaethol a gyhoeddwyd. Mae'r Gofrestr Prosiectau Corfforaethol a'r Gofrestr Risg Gorfforaethol hefyd i'w gweld yng nghefn y ddogfen.

5. Sut mae'r penderfyniad yn cyfrannu at y Blaenoriaethau Corfforaethol?

- 5.1. Mae'r Adolygiad Perfformiad Blynyddol yn cynnwys gwerthusiad o lwyddiant y Cyngor i gyflenwi yn erbyn ei blaenoriaethau corfforaethol.

6. Faint fydd hyn yn ei gostio a sut y bydd yn effeithio ar wasanaethau eraill?

- 6.1. Nid oes unrhyw gostau ychwanegol yn gysylltiedig â'r adroddiad hwn.

7. Beth yw prif gasgliadau'r Asesiad o'r Effaith ar Les?

- 7.1. Nid oes angen Asesiad o Effaith ar Les ar gyfer yr adroddiad hwn. Cynhaliwyd Asesiad o Effaith ar Les ar gyfer y Cynllun Corfforaethol ei hun, a chafodd ei gyflwyno i'r Cyngor Sir pan gymeradwywyd y cynllun ym mis Hydref 2017. Bydd unrhyw brosiectau / rhaglenni gwaith unigol o fewn y Cynllun Corfforaethol wedi cael eu hasesu'n unigol, wrth i unrhyw gamau gweithredu newydd fynd ymlaen.

8. Pa ymgynghoriadau sydd wedi'u cynnal gyda Chraffu ac eraill?

- 8.1. Mae'r adroddiad wedi'i ddatblygu gan y Tîm Cynllunio Strategol, mewn ymgynghoriad â gwasanaethau eraill y cyngor. Gofynnwyd am adborth eisoes am yr

adroddiad gan yr Uwch Dîm Arweinyddiaeth, Llywodraethu Corfforaethol a'r Pwyllgor Archwilio (bellach yn ofynnol o dan Ddeddf Llywodraeth Leol ac Etholiadau (Cymru) 2021), Craffu Perfformiad a'r Cabinet. Ar ôl y Cyngor Sir, caiff yr adroddiad ei gyhoeddi ar ein gwefan.

9. Datganiad y Prif Swyddog Cyllid

9.1. Nid oes goblygiadau ariannol arwyddocaol o ganlyniad i'r adroddiad hwn.

10. Pa risgiau sydd ac a oes unrhyw beth y gallwn ei wneud i'w lleihau?

10.1. Byddai peidio â chyhoeddi'r Adolygiad Blynyddol erbyn y dyddiad cau ar 31 Hydref yn debygol o arwain at argymhellion statudol gan Swyddfa Archwilio Cymru, gyda goblygiadau sylweddol i enw da'r Cyngor.

11. Pŵer i wneud y Penderfyniad

11.1. Mae'r Cynllun Corfforaethol a'r Adolygiad Perfformiad Blynyddol yn elfennau allweddol o Raglen Cymru ar gyfer Gwella (2010), sy'n cael ei chefnogi gan ofynion statudol Deddf Llywodraeth Leol 1999 a Mesur Llywodraeth Leol (Cymru) 2009. Wrth fynd ymlaen, bydd Deddf Llywodraeth Leol ac Etholiadau (Cymru) yn berthnasol.